

Mins

Van Wikipedia

Dit artikel is gesjreve (of begós) in 't Mestreechs. Laes hie wie v'r mit de versjillende saorte Limburgs ómgaoen.

De **Mins** (*Homo sapiens*) is 'nen hiel hoeg oontwikkelden primaot oet de femie Minsape, mèt gans rechopstoonde gaank, weineg hoedsbehaoring en hendeg groete hersedes. Mèt dees lèste eigensjap heet heer ziech 'n civilisatie um ziech heer kinne bouwe, en heet heer 'n aontal unieke kwaliteite die häöm in eder geval vaan de meiste bieste ondersjeie: 't vermoge tot taolvörming, 't gebruik vaan wèrktuige en de idee vaan de ziel. Recent oonderzoek heet evels aongetuind tot sommege aander hoegootwikkelde bieste ouch aon al of e paar vaan dees kinmèrke voldoen, wie de chimpansee, d'n toemeleer en 't verke. 't Versjèl is dus neet wezelek, meh wel evident, umtot 't nivo wat de mins in zien besjaoving haolt vääöl hoeger ligk. De wetensjap die de mins bestudeert is de antropologie.

Inhawd

Evolutie

- De mins in verhajding tot aander ape
- De aofsplitsing vaan de ape
- 't Geslach Homo

Fysieke kinmerke

Sociaal leve

Evolutie


Zuug ouch: Evolutie vaan de mins

Sinds de opstèlling vaan de evolutietheorie is de evolutie vaan de mins oetgebreid oonderzoch. Umtot me in de negentienden iew nog 'n ermeuj aon fossiele had, beholp me ziech toen veural mèt levende bieste. De ings aon de mins verwante biestesoot is de chimpansee (toen nog es ein, neet twie soorte gezeen); daorum meinde me soms tot de mins vaan de chimpansee aofstamde. De Neanderthalmins, oontdèk in 1856, liekende daobij 'ne plausibele tössestap. Zoe oontwikkelde me in dezen tied de idee vaan d'n "oermins".

De mins in verhajding tot aander ape

Veural in d'n twintegsten iew zien vääöl mie fossiel minse- en minsapesoorte oontdèk en heet me ziech e completer beeld kinne vörme vaan de minseleke evolutie. Zoe woort al vrij snel dudelek tot de mins neet vaan noe levende ape *aofstamp*, meh wel 'ne gemeinsjappeleke veurvajer mèt ze heet.

Versjèllende soorte minsape stoon ummer ei stepke wijer vaan de mins eweg: mins, chimpansees, gorilla's, orang-oetan en gibbons vörme same de superfamilie *Hominoidea* (startloes ape); mins, chimpansees, gorilla's en orang-oetan vörme same de familie *Hominidae* (eigeleke minsape); mins, chimpansees en



Ein vaan de mies gaankbaar zeenswijze op de minseleke evolutie. Veur 't euverziech vereinvoudeg.

gorilla's vörme same de subfamilie *Homininae* (Afrikaanse minsape); mins en chimpansees vörme same d'n tribus *Hominini* (klein, intelligente minsape); de moderne mins en "aapminse" veur häöm vörme same de subtribus *Hominina*; de moderne mins en al zien veurgengers en ing verwante (allemaol mèt wiedgoonde teikene vaan intelligentie) vörme 't geslach *Homo* (mins).

De aofsplitsing vaan de ape

Es ierste mins zouw me die soort mote, of kinne, neume die wél 'ne veurawwer vaan de mins is meh neet vaan aander bestaonde ape. De lèste gemeinsjappeleke veurawwer vaan mins en chimpansees waor mesjiens *Sahelanthropus tchadensis* ("Tsjaadse Sahelmins"), dee zeve mieljoen jaor geleie in midde-Afrika leefde. Neet allein vertuint zien gereemsel trèkke vaan zoewel chimpansees es lui, ouch de DNA-analyse vaan chimpansees en lui wijs drop tot de splitsing tösse de twie ongeveer vijf miljoen jaor geleie gebäörde; tot in d'n tied wie *S. tchadensis* leefde de soorte nog neet oetereingegange waore. Ongeveer vijf mieljoen jaor aajd is 't geslach *Ardipithecus*;

dit kinne de ierste minse zien, al vinde sommege gelierde de fossiele nog te aap-echteg. Oonumstreje zien de versjèllende lede vaan *Australopithecus*, die tösse veerenhaaf en tweeënhaaf mieljoen jaor geleie roondlepe. De lede vaan dit geslach lepe ongeveer rechop meh hadde nog relatief klein herses en kóste nog gein werktuige. Oet de Australopithecini kaome twie nui geslachte veurt: *Paranthropus* en *Homo*.

't Geslach Homo

't Ierste geslach bleef ongeveer e mieljoen jaor bestoon. 't Twiede geslach bleef langer, en evolueerde wezelek wijer door. D'n ierste, of in eder geval aajds bekinde, vertegewoordeger vaan dees "echte minse" hètde *Homo habilis*, wat "hendeghe mins" beteikent. Me meint tot heer al 't vuur beheersde en primitief werktuige maakde. Ein vaan zien opvolgers - dao zien mie fossiel minsesoorte gevoonde meh die weure, umtot ze minder belaankriek zien, boete besjouwing gelaote - waor *Homo ergaster*, wat zoeväöl beteikent wie "wèrkmins" en dus ongeveer op 'tzelfde neerkump wie *H. habilis*. Heer had nog groeter herses en heer weurt oonder mie geach de veurluiper vaan de minseleke taol ("Hmmmmmm" - holistische, manipulatief, multi-modaal, muzikaal en mimetische communicatie) es ierste te höbbe beheers.

De naokoumeling van *H. ergaster* splitsde ziech in *Homo erectus* en *Homo antecessor*, mèt de Mins vaan Denisova es meugeleke derde tak (Krause e.a. 2010). *H. erectus* (Dubois, 1892) beteikent "rechoploupende mins" ('n verawwerde benaming, umtot heer, nao me noe wèt, lang neet d'n ierste minsechtege waor dee rechop leep). Heer versjèlde neet vööl vaan d'n ergaster meh waor hiel succesvol: heer verspreide ziech euver e groet deil vaan de wereld en bleef tot zier recent bestoon. D'n in 2004 geïdentificeerden *Homo floresiensis* (Floresmins), pas hoegoet e paar doezend jaor oetgestorve, weurt geach vaan *H. erectus* aof te stamme. *H. antecessor* intösse had alweer vööl groeter herses. Ziene naam, "veurvajermins", dank heer draon tot 'r es de lèste gemeinsjappeleke veurawwer gezeen weurt vaan de twie hoegs ontwikkelde minsesoorte: *Homo neanderthalensis* en *Homo sapiens*. D'n ierste stamde aof vaan 'n populatie antecessores die ziech in Europa en Wes-Azië vestegde. Heer waor good aongepas aon de kaw vaan de iestije en moot in intelligentie amper veur de moderne mins höbbe ondergedoon. Bij de antecessores die in Afrika bleve ontwikkelde ziech oetindelek d'n *Homo sapiens*, dee ziech euver de ganse wereld zouw verspreie. De ondersoort dee veer kinne weurt aongeduid es *Cro-Magnonmins*.

De hei besjreve evolutie is die wat euvereinkump mèt 't pleetsje heineve. Sommege zien in de Cro-Magnonmins en de Neanderthaler gein twee apaarte soorte meh meine tot ze väöl korter bijein stoonte. Aonhengers vaan die theorie spreke vaan *H. sapiens neanderthalensis* en *H. s. sapiens*. In dat lèste geval is 't ouch nog meugelek tot de blaanke en Aziatische lui veur e deil vaan de Neanderthalers aofstamme, umtot de Cro-Magnonmins ziech bij zien expansie mèt de Neanderthalers vermingk kin höbbe.

Fysieke kinmerke

De mins weurt vaanaajds tösse 160 en 170 cm laank; in modern tije is dat mie gewore door euvervleujeg ete en minder krenkde. Zie gewiech ligk tösse 60 en 80 kg; mennekes zien gemeinelek belaankriek zwoerder. D'n draagtied bedreug nege maond; de jäög vaan e minsekind doort zeker 16 jaor. De levesverwachting is de lèste iewe touwgenome vaan zesteg (veur gezon lui) nao tösse zeventeg en tachtig; oetsjeters behole al mie es 110. De mins heet zien liechaamsbehaoring zoe good wie verlore en dreug gemeinlek kleiaasj veur ziech tege de kaw de besjerme.

Sociaal leve

De mins is gemeinsjappelek georganiseerd en woent in groeter of kleiner gemeinsjappe van zelf gebouwde oonderkoumes (stei en dörpe). De take die de gemeinsjap nudeg heet weure door de gemeinsjap zelf verdeild oonder häör lede. De stei en dörpe vörme ziech gewoenelik tot volke. Konflikte tösse gemeinsjappe en volke zien tamelek frequent, me sprèk daan vaan oorlog.

't Intellek vaan de mins uut ziech in taol, wetensjap, religie en kuns. De soort is sterk op vermaak geriech, wat häöm de bijnaom *Homo ludens* oplieverde.

't Seksueel leve vaan de mins is oetgebreid, umtot de mins 't gaans jaor op seksualiteit is ingestèld. Aanders es zienen inge verwant de bonobo is de mins in princip monogaam; dees eigensjap steit garant veur de creatie vaan families, in de minseleke maotsjappij veurnaom es kleinste sociaal einheid.

Aafkomstig van Wikipedia, de Vriej Encyclopedie. "<https://li.wikipedia.org/w/index.php?title=Mins&oldid=410962>"

Dees pazjena is 't lèts verangerd op 10 okt 2016, 20:22.

De teks is besjikbaar ónger de Creative Commons Naomsvermelding/Geliek Deile licentie. 't Is mäögelik dat aanvöllende veurwaarde van toepassing zeen. Betrach de Algemein veurwaarde veur mie informatie.